

## Unyenyekevu wa Kweli

*Mungu alivichagua vitu dhafu vya dunia ili aviaibishe vyenye nguvu ... mwenye mwili awaye yote asije akajisifu mbele za Mungu—1 Wakorintho 1:27 – 29.*

**B**aada ya kupaa kwa Yesu, matabibu, wanasheria, makuhani, watawala, waandishi na wanateolojia walisikiliza kwa mshangao maneno ya hekima na yenye nguvu kutoka kwa watu wasio wasomi na wa hali ya chini. Watu hawa wenye hekima walishangazwa na mafanikio ya wanafunzi wa hali ya chini na hatimaye wakajiridhisha kwa kuzingatia ukweli kwamba walikuwa pamoja na Yesu na kujifunza Kwake. Unyofu wao na usahili wa mafundisho yao ulikuwa sawa na unyofu na mafundisho ya Yesu....

Wale ambao wanafundisha ukweli usiopendwa leo lazima wawe na nguvu kutoka juu zitakazoambatana na mafundisho yao, vinginevyo juhudi zao hazitakuwa na tija. Kwa masikitiko neema ya thamani ya upole inapungua katika huduma na kanisa. Watu wanaohubiri ukweli wanafikiria zaidi juu ya uwezo wao wenyewe. Unyenyekevu wa kweli utamwongoza mtu kumtukua Yesu na ukweli kwa kutambua utegemezi wake kamili kwa kweli za Mungu. Inaumiza kujifunza masomo ya unyenyekevu, wakati hakuna faida yoyote mwishowe. Uchungu unaoambatana na wakati wa kujifunza masomo ya unyenyekevu ni matokeo ya kufurahishwa kwetu na makadirio ya uongo juu yetu wenyewe, kiasi kwamba hatuwezi kuona hitaji letu kuu. Ubatili na kiburi hujaza mioyo ya watu. Neema ya Mungu pekee ndiyo inayoweza kuleta mabadiliko.

Ni wajibu wako ... kujinyenyekeza na usimngoje Mungu akunyenyekeze. Mkono wa Mungu wakati fulani huwa juu ya sana ya wanadamu ili kuwanyenyekeza na kuwaleta katika nafasi ifaayo mbele Zake; lakini ni vizuri jinsi gani kuunyenyekeza moyo kila siku mbele za Mungu. Tunaweza tukajidhalilisha wenyewe au tunaweza tukajijenga katika majivuno na kusubiri mpaka Mungu atushushe....

Ili kuweza kuuelewa ukweli, lazima tujidhibiti na kuifundisha akili kudumu kutafuta ili kupata neema ya ucha Mungu wa kweli. Sasa unajua kidogo kuwa hii ina maana gani. Yesu anapokuwa ndani yako, utakuwa na kitu zaidi ya nadharia ya ukweli. Hutorudia tu mafundisho ya Yesu aliyoyatoa alipokuwa hapa duniani, bali utakuwa ukiwafundisha wengine kwa maisha yako ya kujikana nafsi na kujitoka kwa ajili ya kazi ya Mungu. Maisha yako yatakuwa hubiri lililo hai, likijawa na nguvu kuu kuliko mahubiri yaliyotolewa mimbarini.

Unahitaji kustawisha ndani yako roho isiyo ya ubinafsi, yenye neema ya kujikana nafsi na upendo ulio safi, ambao unatamani kuona wengine wakiutekeleza maishani mwao. Ili kuweza kuendelea kukua katika akili ya kiroho na kuimarika zaidi na zaidi, unahitaji kukuza tabia za kutumika katika majukumu madogo yaliyoko njiani mwako. Hauhitaji kungojea fursa kwa ajili ya kufanya kazi kuu, bali uchukue nafasi ya kwanza ili kujidhihirisha kuwa mwaminifu kwa kile kilicho kidogo zaidi na kwa kufanya kazi hivyo unaweza kuinuka kutoka nafasi moja ya uaminifu hadi nyingine (*Testimonies for the Church 4:378-380*).